

兩  
浙  
金  
石  
志

兩浙金石志卷二

揚州阮元編錄

唐有道先生葉國重碑

唐故葉有道先生神道碑

并序

括州刺史李邕文并書

昔者誕發老君道純天地生得夫子身負日月且時宰不  
宗主人勿用矧乎埋照後谷潛盤窮山幽姿蛻於塵容素  
尚允於仙類豈辟命行矣爵服繫之而已哉公諱國重字  
雅鎮南陽葉縣人也自少典錫羨高辛纂緒陶唐重熙後  
稷邁種文王之允乃食於沈尹成之子載封於葉受氏享  
國大哉邈乎逮乎祖乾昱克壯其猶永孚於德瑾戶習隱  
塞兌億坤碩膚長材通理博藝雖安車累至而堅臥固辭

故慶祚克開眉壽維永矣厥考道興性守宮庭道敷邦國  
居鬼從地率神從天受籙以怛之飛符以北之扼魍魎之  
邪劉臺台之崇有足奇也至於揮札落紙引弓貫革特起  
五部廣推大餘侯誰嗣哉先生靈承道宗異聞訓誘弱喪  
文貌幼尙純篤仙骨有象童心不萌專精五龍遍遊羣岳  
聰以知遠明以察微達死生之占體物氣之變嘗以靜貞  
動耗息影歸心雲臥北壑林巢仙居人絕不鄰道阻且右  
獨往幽勝永歌隱淪放閒保和習虛致靜挹五石之髓擷  
三芝之英時哉不留歲聿其逝緇髮純漆韶顏握丹事適  
元同神與道媾惟寂惟冥不飲不食數十載於茲乃昇聞  
帝庭駿發皇眷簡才受命降尊加禮將之以文馬速之以

陽穀先生盱眙長揖握手高謝曰自昔帝舜登庸德輝允  
鑠光武繼統吏道孔嘉且薛方逢萌備外臣之禮虞仲夷  
逸終處子之業豈垢俗疵物偏貢介性將探道慕類坐致  
奇齡使者蓄而然之疑申遂行之旨乃周覽廬室躬省倉  
庾考疇人之疆晦訊家童之作業皆儉以遵約安能維始  
味不甘口色無養目信以爲著誠去僞敢守難奪順風可  
卽強起曷至焉遂虛觀復命慙歎聞列朝廷企其高渴其  
道聆嘉聲而屬想者豈勝言哉有司以天元書缺星度官  
弛亡五德之運謬四時之分荆鬼越祥不知所況子亥母  
癸烏識其原皆乘遽遠尋請益傳受可謂繩誠列而曲直  
徵衡誠懸而輕重立粵惟博物君子豈伊小說鰕生嗚呼

天不持久人將復歸頽年迫於期頤遠志屈於摧落卜兆  
幽石託墳清林逸人不追國士靡憲泉石沮色鄉縣失聲  
豈無他人惟子之故允子慧明贈銀青光祿大夫歙州刺  
史公罔替厥繇代增其業啟秘籙之高妙揚元津之洪波  
道微若聲心麼若氣吹律煖谷運歷知天屢下辟書終不  
應命孫子景龍觀道士鴻臚卿越國公勿得父書早傳成  
法黃念有訓邁迹自身讀天下之書備方外之術火滌淫  
祀劔誅羣妖恩開五君名動四國其人也排金鎖謁紫庭  
爲帝傲吏其出也法玉京坐元寺作仁宗師故能大匠道  
門冢卿朝右禮食軒座寓直禁廬矣嘗以理氣自強登老  
益壯雖景急節而純孝孔哀是獻封章願拜墳墓有軫帝

念載形王言神札以飛傳瑞乃發羣公帳餞列蕃郊迎朝  
章有輝鄉人皆慶枉以未技揚於孝心惟先志以追遠立  
豐碑以紀德夫何閒然其詞曰

宗門素履家代隱仙道一相孕薪火交傳黃公術在赤水  
珠聯道開幽鍵性與真筌一門累祖四世百年抗迹巖谷  
消聲天地卓爾遐舉藹然高致麝以臭焚珠以明墜人則  
有心徵亦不至保身匪媮全樸爲利孝孫增業明辟順風  
志嘗無忝事或不同徵賢朝滿舉逸山空曷由高枕克謝  
代工測微達變盡規納忠皇眷雖渥孝思亦深章服粲粲  
傳駟駸駸載遠廷闕是展墳林紀石追遠昭銘率心孝終  
事立榮歿寵今遐超古始永憲江南

開元五年歲在丁巳三月七日侍者青溪觀主詹立一丁  
右碑在松陽縣文二十二行行書徑八分輿地紀勝  
云唐故有道先生葉公碑李邕撰并書世傳法善求  
邕書不可得夜追其魂書之俗謂之追魂碑今按拓  
本似經後人翻刻非北海原蹟末行丁字下作四點  
傳是其魂書至此聞雞鳴而止恐未必然又按舊唐  
書本傳邕貶括州司馬在開元三年以後十三年之  
前其爲括州刺史在配流嶺南後新唐書則云開元  
二十三年起爲括州刺史此碑立於開元五年三月  
題銜已稱括州刺史與兩史不合葉國重史傳無文

其孫法善傳祇及父慧明又稱法善自曾祖三代爲道士皆有攝養占卜之法而不詳列其名今碑載乾昱生道興道興生國重國重生慧明慧明生法善乾昱爲法善高祖是五世皆習黃冠之術矣洪筠軒題云新唐書葉法善傳云開元八年卒或言生隨大業丙子此碑立於開元五年時法善已百二歲故碑云雖暮景急節而純孝孔彰今重摹本脫暮字

唐贈歙州刺史葉慧明碑

大唐贈歙州刺史葉公神道碑

并序

江夏李

國子監太學生

公諱慧明字德昭南陽郡人也其先系自軒后殄于周文



聃季食沈子高封葉因爲氏矣逮問政曰孔好龍得真代  
有聞也昔者惟帝興運乃聖炳靈風雲相從人夢通感閒  
氣駿發良弼大來有開必先憑物爲爲口自然矣則我使  
君降口府乘道流追蹤隱淪叶契幽叟結廬澗沚考盤巖  
椒同人利貞遁代勿用雅好酒德尤邃老經話言解頤精  
口絕倒誘進不倦虛納盡欵好事集門長者闔里每至升  
月帷戶和風林薄植杖嘯谷席皮琴山泰然樂生澹乎忘  
老方口維性壽邇神僊伯赤松之遊縱黃口之術外身先  
物歸根致柔緣以大均持以大定色理不遷寵辱不驚繩  
繩焉熙熙焉孔德之容罔可測已故師長旌禮邦族興化  
智者謂智仁者謂仁雖褐塞桑樞紵衣韋帶必避途加敬

裏風惕息焉是用克聞于家大育厥允則我越公襲上德  
延慶靈生而知之學而習之有專門之資得不承之業纔  
龢玃道旣冠同元訊遠岳之福庭覲幽尋之方士陳咒雷  
駭吐刃電光沉海莫濡蹈冶匪蕪呵萬鬼擗百神殷陰官  
之符變冥司之籙追宄往事坐知來茲膏肓無所遁其形  
霧露不能滋其疾奇跡多緒嘉聲日聞是以 大君孔

休辟命荐至人自臥內問以咎徵造膝必誠遇事偕中時  
更四紀代且五王順風呂請天師敷衽以近 皇極緇

素莫能出右公卿是惟虛左 國家有事天地將旅海

岳公嘗致禮加璧能事潔羞傳駟載途郡邑迎謁者歲四  
三焉自頃賊口嗇禍小人吹蠱敢爲戎首興此厲階

天步未亨人事將殆公乃極陳幽贊大啟聖猷枚卜撰辰  
並走羣望作爲邦翰先口主憂殄勦元兇翼扶 皇統

是嘉厥異式揚爾忠爵賞懋於身寵贈光乎考匪此父也  
曷訓其子匪此子也曷揚其親松楸已行碑版未立永念  
終古追荐孝思驟請 闕廷第如江介遠訪才子枉逮  
鄙夫趙括論兵多缺舊學班固述史實賴家書顧惟成章  
實愧貞石其詞曰

真隱夷軌默僊解形倬哉獨立企古遐征殆庶元德升觀  
丹經服鄉不涅光和不無營築卜岑渚口藥侍琴徐嘯風谷  
緩步月林白雲怡意清泉洗心曷勝不往曷奇不臨迹因  
神遠情隨地深舉代方藉皇口未軾肇口懿子載揚令德

左慈致物越人辨色司察鬼謀役使神力寵被五君

聲聞八極日嘗薄蝕國有多難兇慝口揚忠烈憤惋

亦既先覺克圖幽贊皇哉神武赫然天斷薄言卽戎

于以戡亂帝念疇庸與開列土豈曜厥身實贈弓父

朱藩乃錫紫綬是與存致歿榮忠伸孝舉列列桐栢緒風

興悲表墓有闕紀德無詞哀哀嚴蔭欒欒孝思孰傳終古

是建豐碑贈慧明銀青□□□欽州刺史子道士

瀧善授鴻臚卿封越國公

開元五年太歲丁巳鷄尾七月夷則七日甲辰建

缺

州

張□□□□檢校樹碑侍者洪州翊真觀主盧齊物□

右碑在宣平縣治冲真觀原石久佚所存重刻本字

多訛錯此據何氏家藏舊拓本錄之文二十行八分  
書徑八分首行標題下有江夏李邕口國子監太學  
生云云則撰書明是二人趙明誠金石錄以爲韓擇  
木撰并八分書者誤也舊唐書葉法善傳云括州括  
蒼人而此碑云南陽郡人蓋碑湖始封傳則據其譜  
籍耳其云寵被五君者謂高中睿元四宗與天后爲  
五也

唐法華寺碑

大唐秦望山法華寺碑

并序

括州刺史李邕撰并書

昔者法王道開崛山相現曾是大事職非小緣順喻孔多

證入彌遠故以三界爲宅五濁爲火四生爲子六度爲門  
一乘爲大車十力爲長者轉置熱惱之衆延集清涼之都  
念茲在茲廣矣大矣法華寺者晉義熙十三年釋曇翼法  
師之所建也師初依廬山遠公後詣關中羅什深入禪慧  
尤邃佛乘雖禮數樞衣而名稱分坐與沙門曇學俱遊會  
稽觀秦望西北山其峯五蓮其溪雙帶氣象靈勝林壑虛  
閑比興耆闍營卜蘭若羞湜槃食納如來衣專精法華永  
言實意感普賢菩薩爲下俚優婆提狶子於竹筐寄釋種  
於蓬室師以縮屋未可枕屐乃明移出樹間延入舍下及  
杲日初上相光忽臨乘六牙衛八部勝幡虹引妙樂天迎  
翩僊騰雲遙裔上漢師想望太息沈吟永懷葉公好龍已

遇真物羅漢測佛未了聖心於是苦行自身炯誠通夢宛  
如昔見彌恨前非象勸持經嘗難其語鳥來聽法不易其  
人矧乃攝以蜂王吼以師子禮謁者倚其袂袂讚歎者合  
其風雷時太守孟顗以狀奏聞因以爲寺則知妙法者真  
如之正體蓮華者淨道之假名是故崇厥經署于勝入無  
量義成不住因至若高僧慧基邑人陳載皆踵武投跡傳  
燈襲明或五桂範堂或七寶規殿立普賢座追連弗藍龍  
王讓池鴈子疏塔迦羅衛國連至雲山淨明德宮更開日  
月固足以發慧印啟元門入位畢臻出家偕應則有持證  
等觀永藏同流或慧舉十微或昭明再造或簡文瑞像或  
武帝香鑪寶鈴吟風珠幡交露僧瑤墨意畫長豪之妙光

宮女縫功織大身之變相次有陳隨國施州邑吏擅百寶  
盈於九隅羣經備於三藏所以神鍾警夜保賢聖之天居  
祥鳥肅賓迓軒蓋之雲集忍辱靈草裙萋萋於小莖優曇  
異花舉灼灼於高榦故得人天迴首江海回聲芭蕉遇雷  
倏焉滋茂葵藿隨日至矣勤誠登山而野曠心空浴水而  
垢除意淨施及先律師道岸今弟子釋儼並身林久伐禪  
刺都遣性通七事戒總八關金杖五分優劣旣等繒綵四  
色功德豈殊甘露有加香油不墜頃者豪州刺史前此邦  
別乘太原王公名弼法海廣大慧炬融明德立於衷義聞  
於物邇憚致主之節有耿板竿葛亮報國之誠不忘草奏  
夫人武氏佩服真空千櫓正覺及男緬緒等惟肖二尊克



慎三業若行若坐依佛依僧去煩惱之外糠得慈悲之內  
實起普賢臺一級寫法華經千部廣化人吏大啟津途卽  
普賢臺立法華社每年二月重會一時且地効其靈山呈  
其秀有上座正覺寺主道解都維那神慧僧表道賓律師  
行深慧燈等多材爲林衆器成樂一體和合互用住持相  
與言於王公曰夫名者事之華碑者物之表其或表不立  
則瞻仰失容名不興則讚述無地願言刻石是用齊山朝  
散大夫前侍御史今都府戶曹袁公名楚客其皎如日其  
心如丹負兼濟之雄才託演成之雅意顧慙作者徒使儂  
然其詞曰會計南山秦望北寺高僧往還聖跡標寄耆闍  
比峯法華取義羣公護持歷國檀施陸寶大來海珍揔萃

幡影連珠像光發瑞臺壓龍首殿開鳥翅象駕菩薩烏迎  
車騎異香馥醇神鍾髣髴松巘蕭疎竹澗惹翠網紀有條  
禪律不墜掾曹正直別乘仁智作爲碑板讀述名字

唐開元十三年二月廿八日建 刻石人東海伏靈芝

右碑在山陰縣秦望山天衣寺文二十三行行書往  
年原碑燬於火屢經翻刻已非本來面目矣趙明誠  
金石錄王象之輿地紀勝嘉泰會稽志皆作開元二  
十三年十二月此碑作開元十三年十二月以北海  
本傳攷之其任括州刺史在開元二十三年則是後  
來重刻時遺去一字耳

唐源少良等題名

監察御史源少良陝縣尉陽陵此郡太守張守信天寶六載正月廿三日同遊

右題名在下天竺摩崖文五行正書徑寸按源少良新舊唐書皆無傳惟唐書宰相表有之元和姓纂少良爲國子祭酒匡贊之子又爲司勳員外郎御史臺精舍碑陰二見其名北魏書源賀傳太武帝謂禿髮僧儔檀之子賀曰與卿同源可爲源氏源之得姓始此陽陵官縣尉行事無攷唐書有陽惠元陽城當是其族也張守信官餘杭郡守史傳皆失載咸淳臨安志亦遺之惟太平廣記謬誤門引紀聞云唐張守信爲餘杭太守據此可與題名補入志乘也唐天寶元

年改諸州爲郡改刺史爲太守改杭州爲餘杭郡而  
地理志于江南東道十九郡更名者僅錄常睦處福  
四郡其餘皆從略末書宋周文璞遊天竺詩靜看唐  
人刻相連坐石陰又尋得數行天寶字破他一夜草  
堂眠皆指是跡云

唐子產廟殘碑

□□□□□□□□□□

□不霜京□□道寂等

天寶七載

專知判□□

右殘碑向在河南新鄭縣久已斷裂于奕正天下金

石志黃叔璥中州金石攷皆載之此片石乃嘉興黃明府木誠自新鄭攜歸祇十三字隸體在韓擇木梁昇卿之間惜其文不全耳

唐徐嶠張愿詩刻

右詩刻二種在青田縣石門洞石壁一八分書徑五分題云遊石門山勅採訪大使潤州刺史徐嶠一正書徑七分題云石門山曝布八韻敬贈下缺吳郡守

兼江東採訪使張愿二詩俱爲宋人大書題名于上鏤損殆盡徐詩首二行尙可辨然亦不能句讀矣按徐嶠爲齊聘之孫唐書附齊聘傳云堅子嶠字巨山開元中爲駕部員外郎集賢院直學士遷中書舍人

內供奉河南尹封慈源縣公不言其爲潤州刺史乃  
史文之畧張愿史傳無攷惟蘇州郡志載其名按唐  
書開元二十一年諸道置十五採訪使檢察如漢刺  
史之職徐嶠張愿皆以郡守兼此蓋皆江南東道採  
訪使也蘇州本隸江南道天寶元年改爲吳郡又改  
刺史爲太守徐嶠之刻當在開元二十一年之後張  
愿之刻當在天寶中也錢少詹云瀑布之瀑今人多  
从水旁此刻獨从日旁攷說文瀑疾雨也一日沫也  
一曰瀑竇也詩曰終風且瀑是瀑有三義山泉自上  
出曰瀑布不見於爾雅且取其疾如瀑雨其白如布  
則从水或取其下垂如瀑布之懸則从日於義得兩

通也

唐淳和觀鐘銘

人之巧者與造物同功器之著者與陰陽齊方此邑紫府  
修建鴻鐘懸重千鈞量逾百石爰有南海賢士陳明羽人  
一言于邦千里來應祥金自積良冶子來立埏埴而成模  
制橐籥而運用大力斯拔高爐正開金火合流雲雷皆至  
紅光旁照踴躍密移善應長保於歲年仙侶永聞于時夜  
昔稱北宮之賦三月而成今觀東郭之師不日而就振于  
無境鳴而當律喜堯年之陶鑄荷聖澤而書名皇化遠冒  
于遐方景福願歸于魏闕銘曰

越金旣聚鳧氏作則至用出虛宏之充塞旣集仙聖永清

道德遠及千春方茲一刻蹲熊下峙盤龍上陳剛亦能吐  
聲實爲賓形如天覆響若谷神遠韻無數用之不勤

右銅鐘已碎僅存上截數片正書數十字在松陽縣  
卯山永寧觀按寶刻類編載是銘爲郭階撰郭陽正  
書作於唐乾元二年正月十五日今玩其筆意絕類  
褚河南惜其文殘缺特于志中補錄之末二行有庭  
徐思簡劉待相口口王思時口口及宣義郎字蓋題  
名也處州府志云葉法善奏捨莊宅爲之宣和初方  
寇焚烈焰中不爍聲亦不殺百人昇之不能動及鐘  
樓再造數人挽而上之文云南海賢士陳明羽人是  
亦斯時道侶所爲不盡法善之鑄也



唐郭密之詩刻二種

口使永嘉經謝公石門山作

諸暨縣令郭密之

絕境經耳目未曾曠躋登一窺石門險載滌心神憺洞壑  
閎金澗欹崖盤石楞陰潭下翬翬秀嶺上層層千丈瀑流  
寒半溪風雨恒興餘志每愜心遠道自弘乘輶廣儲什祇  
命愧才能輟棹周氣象捫條厯騫崩忽如生羽翼恍若將  
超騰謝客今已矣我來誰與朋

時天寶八載冬仲月勒

永嘉懷古

諸暨縣令郭密之

永嘉東南盡口祖

志作倚棹

皆可究帆引滄海風舟口

志作沿

緡

雲湍羣山何隱磷万口

志作物

更森秀地氣冬轉暄

志作暄

溟

志作 氛陰改畫緬懷謝康樂口志作 昔茲爲壽志作 逸興

滿雲林清詞志作 冠宇宙嘗遊石門裏口口志作 勝踐宛如舊

峭壁苔蘚濃懸崖志作 風雨驟巖隈口志作 灌莽口口志作

壁 空泉發物是人已非瑤潭淒口口志作 獨漱

右詩刻二種在青田縣石門洞磨崖一題石門山詩

及前後題欸年月凡十一行一永嘉懷古詩及題欸

凡八行俱正書徑寸嘉慶元年二月臨海令華氏瑞

演過此按剔出之按二詩全唐詩未載邑志云郭密

之於天寶中令諸暨建義津橋築放生湖溉田二千

餘頃民便之舊志止載後懷古詩題作石門山而無

前詩未見石刻也

唐龍瑞宮記

官記

秘書監賀知章

官自

黃帝建候神館

宋尙書孔

靈產入道奏改懷仙館神龍元年再置

開元二年

勅葉天師醮龍現

勅改

龍瑞官管山界至

東秦皇酒養射的

□ 西山育山

南望海玉

香火峯

北禹陵由射的潭五□□□

白鶴山

淘砂徑茗□官山□□潭葑田茭池□

洞天第十

名

天帝陽明紫府真仙

會處 黃帝藏書□□□闕□□□□

禹至闕傳書治水□禹之□

下缺

右刻在會稽縣宛委山龍瑞宮後飛來石上文十二  
行正書徑寸嘉泰會稽志云龍瑞宮在縣東南二十  
五里有禹穴及陽明洞天道家以爲黃帝時嘗建候  
神館於此至唐神龍元年置懷仙館開元二年因龍  
見改今額又云山嶺有飛來石其下葛仙翁丹井山  
南則葉天師龍見壇棲神乃候神之誤又吳越春秋  
此山爲黃帝藏金簡玉字之書處有男子自稱蒼水  
使者禹因之得導水之法云云此記所述皆與諸書  
合而諸道石刻錄謂刻於開元二年二月則誤以建

宮之年爲刻石之年矣唐書賀知章於證聖初擢進士庶官至秘書監天寶初請爲道士還鄉里書碑當在歸里之後王象之輿地紀勝載此刻而不及其年月是記後本未書年今石上四圍有界線可證也

唐城隍廟碑

城隍神祀奠無之吳越有口風俗水旱疾疫必禱焉有唐乾元二年秋七月不雨八月旣望縉雲縣令李陽冰躬于神與神約曰五日不雨將焚其廟及期大雨合境告足具官與耆耄羣吏人自西谷遷廟于山巔以荅神休

唐乾元中李陽冰嘗宰是邑邑西山之巔有城隍祠碑刻實所爲記與篆也陽冰以篆冠今古而人爭欲得之昨緣

寇攘殘缺斷裂殆不可讀偶得紙本于民間遂命工重勒諸石庶廣其傳亦足以傳之不朽也

大宋宣和五年歲次癸卯十月朔承信郎就差權處州緡雲縣尉周明迪功郎就差處州緡雲縣主簿費季文將仕郎處州緡雲縣丞史良翰文林郎就差處州緡雲縣令管句勸農公事吳延年立

右碑在緡雲縣城隍廟文篆書八行徑二寸八分後有重刻題記正書二行徑四五分不等碑在宋時已斷裂宣和五年十月緡雲縣令吳延年等重爲勒石李陽冰唐書無傳寶泉述書賦注云陽冰趙郡人工於小篆初師李斯嶧山碑後見仲尼吳季札墓誌便

變化開闔如虎如龍勁利豪爽風行雨集文字之本  
 悉其心胷識者謂之倉頡後身墨池編云陽冰雅好  
 書石嘗貽書李大夫願作篆書六經立於明堂是曰  
 大唐石經志不克就此碑書于乾元二年筆意疎瘦  
 不若他篆之浮勁當是少年之作其書○作曰山作  
 山凡作}皆非

唐李陽冰倪翁洞題字

倪翁洞

過仙都訪□□

此方題名  
八分書在

王瑜

此方題名  
正書左

□□□□□□□□

左下

中玉

右下

會稽□□□□□□

右刻在處州縉雲縣篆書三字字高二尺廣八尺此  
刻載輿地碑目云在處州仙都山初暘谷倪翁不知  
何許人事蹟無徵宋郡守錢孚詩云初暘便是扶桑  
谷洞裏倪翁招我來卽此陽冰之篆同時又有阮客  
舊居詩歐陽文忠公謂爲縉雲之隱者彼以遁俗爲  
高而終以無名于後世可謂獲其志矣倪翁頗類是  
在傳不傳之間耶陽冰是篆淳古嚴肅不似黃帝詞  
宇天清地寧諸刻惜傳摹者少操觚家無能道者茲  
從趙氏舊藏拓本錄之下有題名二段亦不能識

唐黃帝祠宇石刻

黃帝祠宇



李陽冰

丹陽葛蒙勒石

右刻在縉雲縣黃帝祠宇四字徑二尺上有款李陽  
冰三字徑三寸六分皆篆書丹陽葛蒙勒石六字正  
書徑二寸五分此書結體適緊筆力雄偉胡志通書  
碑後詩所謂古篆誇雄奇玉柱貫金鈕想當落筆時  
雲夢吞八九是也元初得此刻疑爲祠扁重摹於石  
者後見王象之輿地紀勝作黃帝祠宇篆額復齋碑  
目有唐仙都山黃帝祠堂碑袁鵬撰雲游子正書咸  
通八年立其爲祠額明矣樓鑰北行日記謁黃帝祠  
宇李陽冰篆額今畱郡庠是宋季祠猶如故也葛蒙

丹陽鐫字之人徐浩書山陰縣額三字卽其所勒歟  
題同此見嘉泰會稽志

唐天清墜寧石刻

天清墜寧 李陽冰書

右刻舊在金華縣光孝道觀今移置縣學一覽亭篆  
書四字徑一尺六寸五分旁有李陽冰署欵正書四  
字徑一寸二分金華傳有少溫篆書北山及赤松山  
大字今皆不存此碑亦經後人覆刻故書體豐茂乏  
生動之趣

唐盧元輔詩刻

遊天竺寺 大唐杭州刺史盧元輔 水田十里學袈裟

秋殿千金儼釋迦遠客偏求月桂子老人不記石蓮花武林山價懸隋日天竺經文隸漢家苔壁蝸皇鍊來處泐中脩竹掃雲霞

右刻在下天竺神尼塔下磨崖文九行右行正書徑二寸此詩全唐詩未載按盧元輔於德宗時自河南縣令除杭州刺史嘗於武林山作見山亭見咸淳臨安志又胥山碑銘元和十年盧元輔文王通書見輿地碑目此疑亦元和時刻又陝西通志云盧元輔滑州人曾爲華州刺史郎官石柱題名有金部郎中盧元輔白樂天有盧元輔除杭州刺史制中云嘗守商都再領京縣皆其應官也石本泐中修竹掃雲霞泐

字係原刻修竹二字係改鑿大唐二字亦添補西湖  
志作洞中蓋據文理未見石刻也

唐宣陽觀鐘銘

維唐大歷十二年歲次丁巳正月甲寅朔廿五戊寅宣陽  
觀奉爲國王聖化普及道俗存亡敬造洪鐘一口用銅  
一千五百斤

口奏勅置觀金紫光祿大夫鴻臚卿越國公道士葉法  
善

刺史賈岌縣令李冲市承鄭保進

率化衆緣道士鄭通靈鄭國清吳靈岳吳昇玄周法慈  
葉朗清吳惠虛鄭仙超葉惠光王法虛葉仙靈已上各捨

十五斤

都檢校道門威儀紫極宮道士葉修然廿斤道士葉齊真十五斤

捨銅卅斤主鄭德保戴公訓夫及吳懷德夫妻爲檀越鄭王卿

捨十五斤鄭懷政廿斤葉招福葉招泰葉思庭戴公之戴德上鄭女娘鄭保蓋葉待賢葉待正周光澤周光遂葉庭芝葉万春俞喜娘葉光超吳懷上陶大娘  
大匠孫性葛光智超

右銅鐘文六面共十二行正書在宣平縣冲眞觀內  
按觀在縣北六里括蒼彙紀葉法善捨室爲之賜額

宣陽續名冲真今鍊丹井及銅鐘尙存卽此刻也宣  
平乃明季麗水分縣麗水又唐時括蒼改名此鐘鑄  
時猶稱括蒼刺史縣令二名舊志復軼之又松陽永  
寧觀乾元二年鐘亦云葉法善奏捨莊宅爲之

唐戴叔倫去思頌碑

唐東陽令戴公去思頌

并序

朝散大夫前守建州刺史陸長源撰

前□□□□

□□□□李秋實書

建中元祀

皇上□景命將致天下於仁壽之域以兵

革□□閭閻□□前□之□猶軫□□□延度求俾又夏

五月壬辰詔書以監察御史裏行戴叔倫爲東陽令□□

□也□□□□□之問城畫墅殺女以東陽爲劇先是  
山寇□□邑人□□□□□人□□□□□□□□  
□□路□聲□之以信縛其賊使其人舒□其役使其人  
勸田□□□□□□□□□□□□□□有□□人  
或卜業□廬廢樹□公關防徵□□□無以□□□□  
□□□□□□□□□□□勤□□使澤有浸由是桑柘  
茂隄塘修平林□陰大壑含潤□□□而□□□無□而  
□□□□□□□□者困於兼并□□者苦於剽掠公□  
之以□□之以□□□□□□□□□□□□□□  
□□然人懷日出之謠犬□夜吠之□政化之□□□  
□□□□□貨□□聚公□□□□□□□□庭無事閭

物不□□鞠茂草於囹圄□□財於□問公字次公本譙  
國人也□□□□□□□□仕之日履官之秋唯□問  
□□□□□□□□之□□□□□□□□□□□□  
□□□□□□莫不負弩先驅□□爭入□□專百里之  
命化一邑之人□□□□□□□□夫□□□□□□  
以親也權豪除盜賊屏□□之以□也□訟止商旅□□之  
以和也□□□帑藏之□□□□□□□□之事傳於郡  
國謳誦之聲聞於里巷且藉□□□人不□□□□□  
□□□□□□□□阜於下副明主□勞之求成蒼  
生已安之業□□□□伏□□□□□□□州之□□  
□□□□輔之才又資於車茂豈□□□殿內□□□



中而已□□□□□□等□□□□□□□□□□清  
等一邑之彥也里正王承系□□□□等十室之賢也及百  
姓□□□□□□等□□□□□□□□逾忠良宰范陽□公  
□信以才望諂公之□□以政□□公之□□以□□□  
公之令欲與□□□樂□□□□□□□□太尉河南□靈  
岫尉隴西李惟清千古立□□□□□□□□□□□□  
□□□□□□□□之遺愛其辭曰

惟聖作乂其運克昌化□□□□□□賢良申命于□令乎  
東陽□□□□□□斂重人散□□公旣賢舉亦以名揚  
簡以□□□□□□□□□□□□□□□□□□□□  
□□路絕豺狼□獄止訟聚貨通商□俗則泰□□則□

□□□□□□□□□□□□□□□□洋洋挹而  
漸廣久而愈芳巖巖貞石休有烈光

□□興元元年歲次甲子五月□□□

右碑篆額九字文八分書二十四行行三十八字在  
東陽縣學官案縣志叔倫字次公譙國人府志作潤  
州人建中元年以御史裏行奉詔令東陽誠信撫輯  
抑權豪勸農桑政通訟簡民以富庶奏課爲一州最  
拜殿中侍御史碑文殘缺過甚細爲諦審僅得其大  
概爾婺書云叔倫去思之碑宋淳熙中移於郡齋

唐袁高題名

大唐州刺史臣袁高奉詔脩茶貢訖至口山最高堂賦茶

山詩興元甲子歲三春十日

右題名八分書十一行行三字在長興縣顧渚山按  
太平寰宇記長興縣金沙泉每歲造茶所也國史補  
唐時以宜興造數多命長興均貢限清明日到京謂  
之急程茶胾說載啄木嶺金沙泉處沙中居常無水  
湖常二郡太守至于境會亭具犧牲拜勅祭泉其夕  
水溢造御茶畢水卽微減供堂者畢水已半之太守  
造畢卽涸矣守咸還旆晚時則有風雷之變此卽袁  
高奉詔脩貢賦詩題名事也白居易有夜聞賈常州  
崔湖州茶山境會亭離宴詩云遙聞境會茶山夜珠  
翠歌鐘俱繞身杜牧有茶山詩云剖符雖俗吏脩貢

亦仙才又云好是全家到兼爲奉詔來樹陰香作帳  
花徑落成堆可徵當時宴游之盛

唐衢州石橋詩刻

刺史韋公鑄外祖信安郡王詩之記

篆額六行在穿上

五言

登石橋尋王質觀基所

衢州刺史嗣

江王

下缺

別有經行所迴跨重巒側粵因求瘼餘條

此疑條字

想尋真域

放情恣披拂杖策聊□□□□□□□□□色虬幡

霧中見鴈塔雲間識薄煙羃遠郊遙峯沒歸翼仙橋危石

架幽洞□□□□□□□□□□易測二教無先後一

相平而直冀茲捐俗心永懷依妙力

衢州刺史 韋公於石橋寺橋下以 外祖信安

郡王詩刻石記

信安郡南卅里有峻山幽谷含異蓄靈兩崖屹峙中隧呀  
黑巨石橫亘作爲洪梁□□□□□□其內也頽洞  
嵌豁穹隆闔聯若鵬垂翼隔閼日月其外也嶽壑揭孽鼇  
踞虬偃如□□□□□□裏異狀觀視駭慮原夫造  
物者將有意乎於其間不然何詭異之至是昔晉代有樵  
人王質於石橋下逢二仙奕碁偶閱終局柯爛而返已時  
移百年斯實神恠惚恍何可詳究暨有梁開國崇尚元陳  
此字改鑿乃立爲梵剎以旌厥異自是之後代爲佳境塵世之  
士得遊造焉 聖唐開元中天枝信安郡王再臨斯郡

王

太宗皇帝子吳王之次子自天分曹

惟嶽祚靈蘊禮樂於生知以戡難爲已任十季分閭塞馬  
不嘶羽儀南宮位副端揆其始至也以初封江王發軔於  
此其再臨也以勳列崇異改封信安遭奸臣貝錦出就歸  
藩之義前於此也姜茲清幽親將藻思雅什在壁八音淒  
鎗後於斯也根其靈蹤將示撫實乃斲木爲局雕木爲仙  
對奕森然若峙並侶可謂開張道樞發明蒙晦者矣 王  
之次三子梁國公峴融液元化弼諧 義軒功成身退復  
臨斯郡今州牧 韋公光輔卽 王之外孫又分符竹似  
續嘉績紹 王繼 公甘棠未凋膏雨相接卓絕當世焜  
煌 高門簪纓舉爲清論簡策編爲典故 公次兄光憲

貞元二春拜連山牧將欲之郡迂道以會于信安交隼旗  
於虎符之前連鴈行於熊軾之上寒景初霽棣華獨春人  
或有榮鮮若斯之備矣懿茲靈府齋慮同遊山蒼鳴騶雲  
隨露冕遍披曩迹備閱真趣想 徽容之如在愴年代之  
口移 王先題詩在橋上危樓之東壁風雨所交魯魚將  
誤恐或墮落堙沉德馨 公乃勒於貞石以傳不朽惟

英王播芳於昔惟

哲孫繼躅於今輝光蟬連前

後相燭不發揚於頌述何彰示於將來以子聳前大理評  
事嚴綬曾恭文進載筆從賞乃命爲記以旌盛烈

大唐貞元三年丁卯歲正月景戌朔九日甲午朝散大夫  
使持節衢州諸軍事守衢州刺史賜紫金魚袋韋元輔建

石橋寺主 下缺

祝紳林英劉彝錢顓梁浹鄭庭堅熙寧辛亥會宿鬪茶于是孟春九日

上宋人題名正書八行行四字字徑一寸五分分列于碑穿左右

右詩刻記碑在衢州西安縣南三十里石高四尺廣一尺九寸正書二十三行行三十九字上有一穿唐刻絕少左下蝕一角亡去五十餘字額上有宋人鬪茶題名八行分列左右此信安王禪仙迹詩外孫韋光輔刻之光輔壻嚴綬記之也朱竹垞謂新唐書表太宗第一子吳王恪恪第三子琬琬子禪舊唐書禪少繼江王踰後封爲嗣江王改封信安郡王景雲開元中兩爲衢州刺史詩題嗣江王當是景雲間初爲



刺史作也予按新唐書表恪第三子琨琨子禕今碑云信安郡王太宗皇帝子吳王之次子世次少一代文述于當時且出懿親似不當誤又言王之次三子峴復臨斯郡光輔之兄光憲迂道來會似皆撫實可信也碑書嗣爲嗣靈爲靈又爲靈偃爲偃剝爲剝美爲美駟爲駟朽爲朽梁爲梁堦爲堦行筆絕似虞永興廟堂碑惜石已不存今就趙氏舊藏本錄之竹垞所見又有元和刺史陸庶游石橋記又有劉迴李幼卿李深謝劇羊滔薛戎六唐人詩刊成二碑畱石橋寺嘉靖中尙存趙鐘脩府志具錄之今皆不可見矣

唐臥龍山題字

貞元己巳歲十一月九日開山

右題字在山陰縣臥龍山頂石壁文二行正書徑四五寸不等嘉泰會稽志及王象之輿地紀勝並作貞元題名又以己巳爲乙巳皆誤按臥龍山顛唐人曾築望海亭元稹李紳皆有詩紀事此十二字必是建亭時匠人所鑿故字體甚劣耳

唐于頔題名

使持節湖州諸軍事刺史臣于頔遵奉詔命詣顧渚茶院脩貢畢登西顧山最高堂汲巖泉□□茶□□觀前刺史袁公留題□刻茶山詩于石

大唐貞元八年歲在壬申春三月□□

右于頔題名在長興縣顧渚山正書十六行行五字  
按長興縣志有境會亭一名芳巖唐時吳興毘陵二  
郡守分山造茶宴會于此洪筠軒云趙明誠金石錄  
有唐袁高茶山詩并于頔撰詩述李吉甫撰碑陰記  
共二卷湖州歲貢茶高爲刺史作此詩以諷高恕已  
孫碑陰述高所歷官甚詳今袁高詩并碑陰俱亡惟  
于頔此記存頔字允志河南人

唐王潛等題名

節度判官侍御史內供奉賜緋魚袋王潛前右驍衛兵曹  
參軍崔珙永貞元年冬季

右題名在下天竺摩崖文七行左行正書徑二寸乾

隆庚子間爲某太守所毀此從趙氏舊拓本補錄按  
崔珙博陵人大和初累官泗州刺史入爲太府卿終  
鳳翔隴州節度使見新舊唐書王澹名不見史傳惟  
鄭芷畦湖錄載唐李直方白蘋亭記碑後有元和元  
年夏節度判官侍御史王澹題跋當卽此人

唐李幼清題名

睦州刺史李幼清元和元年十一月廿口日遊

右題名在錢唐縣定山石壁文二行左行正書徑寸  
李幼清唐書無傳其任睦州刺史見郡志職官表

唐李夷簡題名

饒州刺史李夷簡口遊元和二年四月十二日口

右題名在錢唐縣定山石壁文二行左行正書徑一寸五分按唐書夷簡本傳云元和時官至御史中丞京兆尹楊憑性驚倪始爲江西觀察使冒沒于財夷簡爲屬刺史不爲憑所禮至是發其貪憑貶臨賀尉夷簡賜金紫以戶部侍郎判度支云云史但言屬刺史者從畧也得此刻知其時任饒州其遷御史中丞則在元和二年以後矣

唐鄭敦禮題名

殿中侍御史內供奉鄭敦禮元和二年五月七日起新安  
下關

右題名在錢唐縣定山石壁文四行左行正書徑二

寸鄭敦禮史傳無文不能攷其事蹟新安卽睦州郡名

唐盧縝等題名

范陽盧縝元和四年十月廿五□□□富陽令鄭□□□後□

右題名在錢唐縣定山文四行正書徑二寸後有富陽令鄭□其名已闕按咸淳臨安志載富陽令鄭早唐貞元七年任

唐修禪道場碑

台州隋故智者大師修禪道場碑銘并序

右補闕翰林學士梁肅撰朝散大夫台州刺史上柱

國高平徐放舊 陳修古篆額

天台山自國清上登十數里曰佛隴蓋智者大師現身得道之所前佛大教重光之地陳朝崇之置寺曰修禪及隋建國清廢修禪之號号爲道場自大師歿一百九十餘載大比邛然公光昭大師之遺訓啟以後學門人比邛法智灑掃大師之舊居以護寶所門人安定梁肅銘勒大師之遺烈以示後世云大師諱智顗字德安姓陳氏潁川人也尊稱智者感應緣迹載在別傳夫治世之經非仲尼則三王四代之訓寢而不章出世之道非大師則三乘四教之旨晦而不明昔如來乘一大事因緣菩薩以普門示現自花嚴肇基至靈鷲高會無小無大同歸佛界及大雄示滅

學路派別世旣下衰教亦陵遲故龍樹大士病之用道種  
智制諸外道括十二部經發明宗極微言東流我惠文禪  
師得之於文字中入不二法門以授南嶽思大師當時教  
尚簡密不能廣被而空有諸宗扇惑方夏及大師受之於  
是開止觀法門其教大略卽身心而指定慧卽言說而詮  
解脫演善權以鹿苑爲初明一實用法花爲宗合十如十  
界之妙趣三觀三智之極自發心至于上聖行位昭明無  
相奪倫然後誕敷契經而會同之煥然冰釋心路不惑窺  
其教者藏焉修焉益無入而不自得焉大師之設教也如  
此若夫弛張體用開闡語默高步海內爲兩朝宗師大明  
在天光被四表大雲注雨旁施萬物繇是言佛法者以天



台爲司南殊

塗

異論往往退息緣離化滅涅槃茲山是歲

隋開皇十七年也夫名者實之賓教者道之門大師溷其  
賓闢其門自言地位示有證入故感而應之應之之事可  
得而知也若安住法界現爲比丘等覺歟妙覺歟不可得  
而知也當是時得大師之門者千數得深心者三十有二  
人纂其言施行於後世者曰章安大師諱灌頂灌頂傳緡  
雲威禪師禪師傳東陽東陽與緡雲同號時謂小威小威  
傳左溪朗禪師自緡雲至左溪口元珠相付向晦宴息而  
已左溪門人之上首今湛然大師道高識遠超悟辯達凡  
祖師所施之教形於章句者必引而申之後來資之以崇  
德辯惑者不可悉數蓋嘗謂肅曰是山之佛隴亦鄒魯之

洙泗妙法之耿光先師之遺塵爰集于茲自上元寶應之際此邦寇擾緇錫駭散而比邱法智實營守塔廟莊嚴佛土迴向之徒有所依歸繫斯人是賴汝吾徒也蓋紀于文言刻諸金石俾千載之下知吾道之所以然小子稽首受命故大師之本迹教門之繼明後裔之住持皆見乎辭其文曰

諸佛出世惟一大事天台教源與佛同意赫赫大師開示奧祕載弘要道安住圓位白日麗天天下文明大師出現國土化城無生而生生化兩冥薪盡火滅山空道行五世之後開生上德微言在茲德音允塞惟彼法子護持淨域此山有壤此教不極

唐元和口年十一月十二日僧行滿建

右碑在天台縣大慈寺額題篆書修禪道場碑銘六  
字徑三寸四分文二十四行行書徑寸按大慈寺卽  
智者修禪道場也碑敘其遺行及傳授世次極詳末  
行元和下缺一字據寶刻類編乃六年也梁肅名附  
見唐書蘇源明傳建中時授校書郎後以肅復薦拜  
右拾遺杜佑辟爲淮南書記入爲右補闕翰林學士  
唐文粹載梁肅所作心印銘前有陳諫序云安定梁  
肅學止觀法門于沙門元悟今此碑湛然爲智者五  
世孫天台方外志錄其著作十五種有止觀大意止  
觀文句止觀義例等書肅此文自稱門人則元悟殆

卽湛然之名也徐放唐書無傳惟衢州府志名宦稱  
放字達夫元和九年任衢州刺史此在六年尙官台  
州刺史也

唐十哲贊碑

先師顏回字子淵 制贈兗公

御製

杏壇槐市儒術三千回也亞聖丘也稱賢四科之首百行  
之先秀而不實得無慟焉

閔損字子騫 制贈費侯

銀青光祿大夫守侍中源乾曜

惟顏亞聖惟閔比德讓宰善辭安親順色口靜無間中正

是則非經卽禮至孝之極

言偃字子游 制贈吳侯

大中大夫守中書侍郎上柱國盧從愿

文學□□絃歌政聲動則不徑慮乃先□立言宏遠執禮  
專精升堂入室凜凜猶生

端木賜字子貢 制贈黎侯

黃門侍郎兼鴻臚卿韋抗

聞一知二□□□□冠訐就吳滅言行魯□□□□□□  
□□□□□□□□□□

冉子字子我 制贈齊侯

右散騎常侍允行冲

臨淄辯口學以致祿懲彼不勤見嗤朽木激之忠孝貽毀  
新穀政事登科而不庇族

冉雍字仲弓 制贈薛侯

銀青光祿大夫□□□□□□嘉貞

諸侯爲邦雍也可使道在於政政期於理用刑者何居敬  
則已況禮況德聞之夫子

冉求字子有 制贈徐侯

開府儀同三司上柱國廣平郡開國公宋璟

文之禮樂適可成人目以政事方爲具臣豈才不足寧道  
斯屯其謂國老眇然清塵

仲由字子路 制贈衛侯

右散騎常侍上柱國陸餘慶

偉哉英士既列且忠宿言無諾弊□□□□□□山  
氣雄燔臺□□□□□□

冉耕字伯牛 制贈鄆侯

開府儀同三司上柱國梁國公姚元崇

顯門隸業入室推賢名惟科首行則士先是爲上足寧同  
及肩亡之命矣懷之喟然

曾參字子輿 制贈成伯

禮部尙書許國公蘇頌

百行之極□□以教聖人敘經曾氏知孝全謂手足動稱  
容貌事親事君是則是效

卜商字子夏 制贈魏侯

尙書左丞上柱國裴淮

孔門好學文章粲然言詩屬傳師聖齊賢德不喻法人何  
怨天見疑夫子離羣久焉

唐元和十年十二月三日浙東觀察使越州刺史兼御史  
中丞孟簡置

右碑在紹興府學明倫堂文三列三十八行正書徑  
八分額篆書十哲贊碑四字徑五寸此卽趙氏金石  
錄所收孔子弟子贊是也按新唐書及會要載開元  
八年國子司業李元瓘奏先聖廟爲十哲象以先師  
顏子配則配象當坐今乃立侍餘弟子列象廟堂不



豫享而范甯等皆從祀請釋奠十哲享于上而圖七十子於壁曾參以孝受經于夫子請享之如二十二賢乃詔十哲爲坐象悉豫祀曾參特爲之象坐亞之圖七十子及二十二賢於廟壁帝以顏子亞聖親爲製贊書於石仍令當朝文士分爲之贊題其壁焉此十哲配祀之始今按碑內有曾參贊此因當日顏子旣稱先師制贈兗公在諸賢之上故升附也史傳於此皆畧而不書可據以補闕里文獻矣明皇御製顏子贊當時亦曾刻石今山東金鄉縣學有此碑其閔子以下十贊皆紀載無傳此碑經後人重摹故錯字甚多如宰子爲冉子元行沖爲允行沖裴灌爲裴淮

既烈且忠烈字作列皆是也嘉泰會稽志云孔子弟子贊明皇源乾曜盧從愿李抗元行沖張嘉貞宋璟陸餘慶姚元宗蘇頌裴灌撰

唐蕭悅等題名

前太常寺奉禮郎蕭悅前太常寺奉禮郎王巨



右題名在下天竺摩崖文四行左行正書徑寸餘乾隆庚子歲爲某太守磨去另刻他文此從趙氏舊拓本補錄按白氏長慶集載協律郎蕭悅善畫竹舉世無雙歷代名畫記亦稱其工竹白居易游恩德寺詩序中有蘭陵蕭悅則此題名當是長慶間所刻

唐烏重儒題名

泉州刺史烏重儒寶歷二年六月十八日赴任過游此寺  
右題名在靈隱龍湫洞口摩崖文三行左行正書經  
寸餘烏重儒唐書無傳其官泉州刺史見何喬遠閩  
書但稱寶歷中任其事跡亦不載

唐龍宮寺碑

唐龍宮寺碑

并序

浙江東道都團練觀察處置等使中散大夫檢校左散

騎

常侍兼越州刺史御史中丞

賜紫金魚袋李紳撰

會稽地濱滄海西控長江自

空二字

大禹疎鑿了溪人口宅

土而南巖海跡高下猶存則司其水旱泄爲雲雨乃神龍  
之鄉爲福之所寺曰龍宮在剡之界靈芝鄉嶺亭里地形

爽塏林嶺依抱刹宇頽毀積有年所自瓶置基三徙而安  
此地像儀消化鍾磬不揚堵波已傾法輪莫轉釋老脩真  
持誠茲寺護念常啟願興伽藍而歲月屢遷物力無及貞  
元十八載余以進士客于江浙時適天台與脩真會遇于  
剡之陽師言老禪有念今茲果矣顧謂余曰後當領鎮此  
道幸願建口龍宮以資福履余以爲孟浪之詞笑而不答  
師曰星歲有期愚有冥告臬元和三年余罷金陵從事河  
東薛公萃招遊鏡山師已臥病而約言無口大和癸丑歲  
余自分命洛陽承字空二詔以檢校左騎省廉察于茲歲逾  
再口而脩真已爲異物龍宮棟宇將盡命告墳塔因追昔  
言遂以頭陀僧會真部領工人將以葺事余以俸錢三千

貫空二

監軍使毛公承泰亦施以月俸俾從事寮吏咸同

勝因間里慕仁風靡爭施子來之功力雲集清涼之蓮宇

鬱興浹旬而垣墉四周逾月而棟幹連合煥矣真界昭乎

化城擇口行僧居之以惣寺事因具香饌告誠

空二

法王

上以資

空三

我后無疆之祚次以資龍神水府之福以名

寺之功力爲祐靈之顯報一雨之施潤洽必同

空二

佛言

龍王心力所致使七郡山澤城邑万人丕福所安暨我龍

德是用迴此法力永資泉官僧齋護念常爲仰荅余固不

敢以脩真之言自伐俾竭誠以爲人刻石記言于寺之刹

銘曰

滄海之隅會稽巨澤惟禹功力生人始藉土壤山嶼濱海

之東溟漲空濶邈祕龍宮貝闕難知珠官莫測雲雨交昏  
深沉不隔聞法必聽依字二佛必降豈騰溟海亦化長江  
既資勝因爲龍景福節宣風雨以成播育撞鐘以告三界  
必聞唯爾龍室昭昭不昏我□□有僧傳信斯人已亡  
斯言不泯敬報前志以垂後功建飾儀相昭明有融普利  
羣生因資已下缺

唐大和九年乙卯歲四月廿五日建下缺勾當造碑石并  
殿內石長明燈等下缺

右碑在嶧縣西北龍官寺一名龍藏寺額篆書修龍  
宮寺之碑六字徑三寸四分文二十三行正書徑寸  
李紳題銜散騎下缺十字今據嘉泰會稽志補書於

旁攷唐書本傳紳以太子賓客分司東都大和中李  
德裕當國擢浙東觀察使卽碑所云大和癸丑自分  
命洛陽承詔以檢校口騎省廉察于茲也公垂石刻  
載於寶刻類編者尙有華岳廟題名端州石室題名  
及少林寺詩三種此碑書法雄偉亦可想見其他云  
唐龍泉寺造象題名

王萬朝贖釋迦牟尼佛一軀永充供養此四行正書徑八分在碑首中間牟尼佛象之上

王二娘贖文殊菩薩一軀永充供養此一行正書徑六分在碑首之左文殊象側

樓十娘贖普賢菩薩一軀永充供養此一行正書徑六分在碑首之右普賢象

側

唐大和九年歲次單閏月在難賓中旬八日頭陀蔡宏願  
率化衆緣永充供養謹鐫施主姓名於西廡之理以昭其  
功績不朽者也

吳伯倫 程遲 邵大娘 邵昌 陳公及 勞詮 劉

五娘 勞華 楊十二娘 胡珍 朱十五娘 邵仕興

胡三娘 周證 俞季□ □□□ 徐子容 戚榮

俞昭 劉啟 劉汎 蔡興 蔡峯 王萬珍 孫六

娘 于浼 何李能 朱需 劉盱 胡津 胡□□

□□ 徐子華 陳廿二娘 項元 胡大娘 張三娘

臧十一娘 陳五娘 王永 王公俊 何曇 徐六



娘 徐玘 陳萬宗 周五娘 周三娘 □□ 棲法

藏 陳清曇 梁朝 劉五娘 朱紹宗 嚴良 胡五

娘 鄭禹 莫諒 何祿 綦元 綦景 陸招 施□

□□□ □□ 劉元湍 葉駟 蘇詳 余二娘

孫朝 邢慶 戎疆 嚴泰 羅超 顧榮 徐文質

潘達 潘玠 於□ □□□ □□ 李中諫 葉常

密 柳榮 戴大娘 蔡暉 周華 胡仕良 何瑫

何鑾 王海 虞萬殷 虞林 劉潭 何元 □□

□□ 舒春 朱十一娘 徐十二娘 胡十一娘 周

三娘 周瑫 雷岳 杜安 潘琬 潘十五娘 盧光

德 王元起 聞儒 戎良 □□ □□□ 葉金

馬一娘	口口	陶四娘	葉敬	萬石	姜二娘	璉	黎玩	施五娘
	口三娘	俞良	陳璉	鄭十五娘	王季良	口口口	林璿	益十一娘
	許皓	秦華	韓蘭	王宰	徐昂	口口奴	劉三娘	成昇
	張永暹	傅行溫	謝融	何達	斯二娘	葉德	盛道通	方五娘
	劉文後	彭珍	任惠	江澄	管儒	馬十二娘	車良	毛芳
	顧望	羽芊	翁高	口口	楊瑄	張待榮	羽八娘	應二娘
		陳暹	張素	口卓	鍾		車	

右碑在餘姚縣龍泉寺碑額上刻佛像三尊筆畫極工細下刻記文二行行書徑八分又施主姓名十一

行行書徑六分此碑砌入佛像後惟下截湯漣一二  
字餘則清晰如新書法頗似李北海絕可愛玩珉字  
缺筆葉字作葉皆避太宗諱大和爲文宗紀年石刻  
無作太者今板本書譌作太皆當以此正之

唐龍興寺經幢

佛頂尊勝陀羅尼經序 經序不錄

佛頂尊勝陀羅尼經 經文不錄

開成二年正月一日建 建主鄭徹 同建造僧宗亮

同勾當造幢吳中則 處士胡季良書 都料匠吳興沈

郁 弟咸刻字

奉爲國王太子輔相大臣州縣案察及多生父母十方施

主法界有情重脩此幢永充供養大中五年八月廿四日  
建 勾當僧可儀 大德僧幼則 老宿僧惟素 大德  
僧道儀 供奉大德僧貞實 監寺大德僧良滌 長講  
律大德僧懷志 僧常居 法師洪彬 僧惠超 都維  
那僧志圓 寺主僧文父 上座僧智常同捨錢助緣人  
前衡州衡山縣令陳侏前國子監明經姚繼文前明經夏  
敦禮祝師益陳謙徐宏發徐口汪景復湯簡文褚達鄭絳  
錢處實沈文漸朱德

梁乾化五年五月八日頭陀僧處道重修建內有舍利五  
十四顆琉璃瓶盛 淳祐八年三月初八日口口衆人修  
口口口是幢久沒民間幸于明崇禎丙子年放光遂得興

緣檀越

沈演方子將馮洪業王元建

捨資沙門

元神海音

復創于大清順治

乙未九月十三日千佛寺住錫龍興口忠重修建

幢下截

密漸邦口口葛口口舒三娘口口何十一娘口口陳簡

孫韶楊璘徐口欣盛口口陳華郭六口朱豐朱鵠徐鵠張

口劉歡口口

以上第一面

顧瑜口口許敬真韓思齊錢李榮口華姚通沈口王季超

梅榮沈二娘馬雲沈暉姚秀茅宏簡熊鈞湯述嚴景運曹

峯俞行言談欽楊升

以上第二面

張行簡俞達口齊四娘口口顏忠悅口口鄧文口口口虞

公達口口黃元志鄧口嚴皓張口莫惟彥口口明景元周

口吳景口陳口以上第三面第  
四面第五面

口口口口朱口口口口口口口高口口魯口口口

徐通口口楊二娘口口王二口口口孫口口口口口口

口口口口口以上第  
六面

口口口口吳口口口朱迎口口孫簡口口口九娘口口董

口口口劉口口口口口口徐君直口口俞亮口口以上  
第七

面

安及口口李從直王宏簡陳峯薛口口口口口丁仲蠲

口口歐陽彰賈開吳俊璩叔珣何珙滕榮夏十娘周度范

安馬千口祝鈞范口以上第  
八面

右幢在仁和縣龍興寺內今稱祥符寺石高五尺六

寸八面周廣六尺四寸額題篆書佛頂尊勝陀羅尼  
微妙救危濟難之寶幢十六字文每面十行惟第四  
面十一行前刻經序行書經七分後經文題記俱正  
書經六七分不等是幢建於唐開成二年其後又有  
大中五年及後梁乾化五年宋淳祐八年明崇禎丙  
子年 國朝順治乙未修幢諸記幢座間刊姓名三  
列當是開成間施主題名今大半剝蝕矣宣和書譜  
載胡季良工行草字體溫潤有秀穎之氣今浙中經  
幢出季良手書者尚有歸安縣天寧寺幢蕭山縣覺  
苑寺幢二種

唐楊漢公等題名

湖州刺史楊漢公前試太子通事舍人崔行章軍事衙推  
馬祝州衙推康從禮鄉貢進士鄭口鄉貢進士賈口開成  
四年口月十五日同遊進士楊知本進士楊知範進士楊  
知儉侍從行

右題名十一行正書徑寸餘左行在長興縣顧渚山  
之明月峽境僻路險人跡罕至嘉慶辛酉春暮錢唐  
何君嘉定瞿君訪碑至此拓得唐宋石刻五種皆邑  
志未載此其一也鄭元慶石柱記箋釋云顧渚山下  
有唐朱貢焙院院側有清風樓絕壁峭立於大澗中  
流亂石飛走曰明月峽茶生其間尤爲絕品陸羽茶  
經以蒙山頂第一顧渚次之其地與宜興接壤代宗



時以宜興歲造數多命長興均貢貞元五年歲限清明到京謂之急程是時湖常二州爭先赴期以趨一時之澤袁高有茶山詩備述當日擾民之害開成三年刺史楊漢公表奏乞寬限詔從之每造茶時湖常兩郡刺史親至其處大率以立春後四十五日入山暨穀雨始還是時漢公以貢焙至此遂與僚友諸男題名巖壁此卽奏乞寬限之次年石刻月分已磨滅以意推之大約四月以前錢少詹大昕云唐書漢公傳但云除舒州刺史徙湖亳蘇三州刺史不言除授之年湖州府志題名云漢公開成三年三月自舒州移任湖州充本道團練使此題云四年則蒞任之次

年也後列楊知本等三人從行當是漢公之子據本傳祇載子籌範二人宰相世系表漢公子有思愿輝籌範譚知章篆筠籛簾管十一人未見有名知本者殆其子初名乎知範當卽範後去一字耳漢公兄虞卿之子有知退知權而漢公子亦有知章蓋楊氏羣從多以知聯名也

唐等慈寺經幢

等慈寺佛頂尊勝陀羅尼經幢

經咒不錄

譙國奚虛已書

在首行經題之下

上福寺主僧

上座僧紹宏

都維那僧清溢

僧神亮

文則

德言

寶泉寺僧清印

上座元緒

都維那

惟鏡

開成五年三月口口建 淨信弟子葉再榮并妻童氏男  
五人倩春又邁皓共立永充供養 同勾當經院田人  
趙廣 樂遜 馬成程曇口 刻字口口

右幢在上虞縣城東門內菜圃中石高五尺四寸八  
面周廣四尺八寸而各八行字徑五分開成五年三  
月奚虛已書李茂才方湛訪得之于等慈寺故墟按  
明令楊爲棟等慈寺碑云創于梁治于唐復于宋重  
興于明是幢之建有所自來中又云上福寺寶泉寺  
其時代或有分裂歟奚虛已書不著于錄字體疎朗  
宋歐陽文忠龍岡阡表極似之同時有會昌元年奚

獎尊勝幢今在山陰戢山書院見寶刻類編而虛已  
名獨遺之葉再榮五子而命名頗雅馴不諧俗亦一  
時之閒人歟

唐南嶽道士邢口等題名

大唐開成五年六月十八日□□□□岳道士邢口錢唐  
縣令錢華記道士諸□□元書

右題名在錢唐縣吳山青衣洞文七行八分書徑寸  
餘癸辛雜志云閱古泉硯旁有開成元年南嶽道士  
邢令聞錢唐縣令錢華題名道士諸葛鑑元鐫之日  
今拓本開成下確是五字邢下只一字似全字諸葛  
鑑元乃書石之人並非鐫石者書史會要載諸葛鑑

元善八分書想亦據此刻也

唐戒珠寺經幢

佛頂尊勝陀羅尼經序序文不錄

佛頂尊勝陀羅尼經經文不錄

大唐會昌元下缺建都維那口口上座宏達寺下

缺檀越主姚寓錢異章造都勾當下缺郢人應成

鍊客程曇下缺

前昭義軍節度要籍試右口口下缺河內下缺此行在

首面經序題下

右幢在山陰縣戒珠寺後戡山書院斷爲二石俱高二尺二寸八面周廣四尺八寸每面行書八行徑六

分嘉泰會稽志云會昌元年六月二十七日建前昭義軍節度要籍試右監門率府兵曹參軍上護軍奚獎書今年月存大唐會昌元五字書人銜名止存十字宋嘉泰時碑猶未缺志文當可據也案新唐書百官志云節度使副大使知節度事府院法直官要籍還要親事各一人卽此所謂節度使要籍也又云太子左右監門率府兵曹參軍事各一人正九品下卽此右監門率府兵曹參軍也上護軍左右監門率府下無之惟親事府下注云左一右一護軍府護軍各一人副護軍各二人宜卽彼左右護軍歟志又稱龍朔二年改左右監門率府曰左右崇掖衛武后垂拱

中改左右監門率府曰左右鶴禁衛此在會昌元年  
猶稱右監門率府者蓋中宗復辟後仍復舊稱如龍  
朔垂拱之間亦改而仍復也奚獎無攷嘉泰志又云  
奚獎書尊勝經小字開成四年建在餘姚龍泉寺惜  
今未得宋高翥遊戒珠寺詩云欹斜竹屋羲之宅磨  
滅經幢率府碑蓋卽指此刻矣

兩浙金石志卷二

廣東按察使山陰李

澐刊

臨海洪瞻墉校